

Na osnovu člana 56. stav 2. *Zakona o organizaciji organa uprave u Federaciji Bosne i Hercegovine* ("Službene novine Federacije BiH", broj: 35/05) i člana 15. stav 2. i 4. *Zakona o šumama* („Službene novine Zeničko-dobojskog kantona“, broj: 8/13) ministar Ministarstva za poljoprivredu, šumarstvo i vodoprivredu Zeničko-dobojskog kantona, donosi:

**P R A V I L N I K**  
**o obimu mjera o uspostavljanju i održavanju šumskog reda i načinu njihovog**  
**provođenja**

**Član 1.**

Ovim pravilnikom reguliše se provođenje i trajno održavanje šumskog reda u svim šumama na području Zeničko-dobojskog kantona.

Pod šumskim redom podazumijeva se provođenje mjera u cilju sprječavanja pojava požara, štetnih insekata i biljnih bolesti, sprječavanja štetnog dejstva vjetra, snijega i drugih elementarnih nepogoda, oštećivanja stabala prilikom sječe i izvoza šumskih drvnih sortimena, kao i mjere za zaštitu podmlatka i zemljišta.

**Član 2.**

U šumi, na šumskom zemljištu i u neposrednoj blizini do 150 m od ruba šume, zabranjeno je odlaganje i paljenje smeća, piljevine i pilanskih otpadaka kao i drugih otpadaka ili zagađujućih tvari.

**Član 3.**

Sva živa, a zaražena i insektima napadnuta, veoma oštećena ili izvaljena stabla (sanitarni užitci), moraju se posjeći i izraditi.

Sječu i izradu sanitarnih užitaka nastalih u toku zime treba izvršiti najkasnije do 30. aprila, a sječu i izradu sanitarnih užitaka nastalih poslije navedenog perioda izvršiti do kraja tekuće godine.

**Član 4.**

Prilikom sječe, stabla se moraju obarati u onom smjeru gdje će pričiniti najmanje štete na podmlatku, susjednim stablima i zemljištu.

Na strmim terenima, stabla se moraju obarati uzbrdo osim kada to nije moguće zbog položaja ili rasporeda dubećih stabala. Pravac obaranja takvih stabala doznačar je dužan obilježiti strelicom.

Prije sječe stabala koja se nalaze u mladnicima, obavezno je kresanje grana sa donjih dijelova krošnje.

**Član 5.**

Koranje oblovine i panjeva posječenih stabala četinara i brijesta obavezno je u vremenu od 1. aprila do 1. novembra tekuće godine.

Granje i ovršci (prečnik debljeg kraja ispod 7 cm) kao i kora četinara moraju se složiti u gomile-gromade, tako da se deblji krajevi grana okreću unutar gomile-gromade.

Zabranjeno je formiranje gomila-gromada na mjestima gdje postoji podmladak, uz živa dubeća stabla, u vodotocima, iznad izvorišta vode i na udaljenosti manjoj od 10 m od saobraćajnica.

Granje i ovršci (prečnik debljeg kraja ispod 7 cm) lišćara moraju se skratiti na dužine do jednog metra i ravnomijerno razbacati po sječini, vodeći računa o podmlatku, vodotocima i izvorištima vode.

#### **Član 6.**

Zabranjeno je slaganje prostornog drveta uz čiva, dubeća stabla i na mjestima gdje postoji pomladak, u vodotocima i iznad izvorišta vode.

#### **Član 7.**

Visina panja može iznositi najviše jednu trećinu promjera panja.

Mjerenje visine panja na strmom terenu se vrši sa gornje strane panja-terena.

Dijelovi pojedinih stabala od kojih se ne mogu izraditi šumski drveni sortimenti, prerezuju se na nekoliko dijelova i osiguravaju od pomijeranja a kod četinara i brijesta obavezno se vrši skidanje kore.

#### **Član 8.**

Prilikom sječe i izrade šumskih drvnih sortimenata motornim pilama, dozvoljena je upotreba samo ekološki prihvatljivih, biorazgradljivih ulja i maziva.

#### **član 9.**

Izvoz šumskih drvnih sortimenata od panja do šumskog stovarišta mora se vršiti po predhodno obilježnim i izgrađenim izvoznim vlakama.

Zabranjeno je sa sredstvima za izvoz šumskih drvnih sortimenata silaziti sa obilježenih izvoznih vlaka.

Izvozne vlake moraju biti projektovane i izgrađene tako da se nikako ili minimalno oštećuju dubeća stabla, podmladak ili zemljište.

Na strmim i teškim terenima, gdje ne postoji mogućnost drugačijeg kretanja drveta izuzev tumbanja i lifranja, moraju se poduzeti odgovarajuće mjere u cilju zaštite dubećih stabala i podmlatka.

Lagerovanje oblovine i cijepanih sortimenata dozvoljeno je samo na mjestima predviđenim projektima za izvođenje radova u eksploataciji šuma.

Nakon završetka radova na izvozu šumskih drvnih sortimenata iz odjela, izvođač je dužan sanirati izvozne vlake.

#### **Član 10.**

Primanje šumskih drvnih sortimenata u sječi može se vršiti tek nakon uspostavljanja šumskog reda u skladu sa odredbama člana 3., 4., 5., 6. i 7. ovog pravilnika.

Eventualno poremećen šumski red izvozom šumskih drvnih sortimenata mora se ponovo uspostaviti i trajno održavati.

## **Član 11.**

Ovaj pravilnik stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 05-26-23931/13

Datum : 13.11.2013.godine, Zenica (Bojan Bošnjak, s.r. – ministar)

**MINISTARSTVO POLJOPRIVREDE, VODOPRIVREDE I ŠUMARSTVA ZENIČKO  
– DOBOJSKOG KANTONA**

**(Službene novine Zeničko – dobojskog kantona, br. 470.)**